

# Cumenzà cun naivadad sco editura

Chasa editura rumantscha – pitschna bilantscha

■ (anr/vi) **In biro senza telefon e senza mobiglias. Quai è stada la situaziun da partenza ils 4 da schaner 2010 – l'emprim di da lavur d'Anita Decurtins-Capaul sco manadra da la Chasa editura rumantscha.** Indesch mais pli tard ha la nova editura gia publitgà dus cudeschs ed in cudesch auditiv. En discussiun cun la moderatura *Silvana Derungs* ha Decurtins tradì ch'ella saja sa messa cun ina buna purziun naivadad a la lavur. Ella aveva

la finamira d'avair fin la stad sin maisa almain ina publicaziun. Quai haja ella cuntanschì, ma per fortuna n'avevia ella betg savì ordavant tge ch'i muntia d'edir cudeschs e quanta lavur che quai dettia. Parallel tar la lavur è Decurtins sa scolada en curs da l'Associaziun d'editurs svizzers.

Per cumenzar saja quai stà in avantatg da pudair edir auturs che possedian gia experientscha e che hajan furnì manuscrits gia lectorads, ha ditg Decurtins.

Uschia haja ella pudì profitar ed emprendre dals auturs. In emprim grond success da la chasa editura saja che «In mia vita da vuolp» da *Leta Semadeni* saja gia vendì ora suentar paucs mais ed ins possa stampar ina segunda ediziun. L'emprima ediziun hajan ins fatg cun 800 exemplars. Quest dumber sa laschia tuttavia cumparegliar cun quel da cudeschs lirics tudestgs, ha ditg Decurtins. Sco proxima ediziun è planisà in roman istoric.



**Silvana Derungs ha moderà il discurs cun l'editura Anita Decurtins-Capaul.** FOTOS C. CADRUVI